

til greina að fullu, enda eru þær ófyrndar, sbr. 1. tl. i. f. 3. gr. laga nr. 14/1905.

Eftir þessum málalokum verður stefndi dæmdur til að greiða stefnanda málskostnað, er þykir hæfilega ákveðinn kr. 45.000.

Björn Þ. Guðmundsson borgardómari kvað upp dóm þennan.

D ó m s o r ð :

Stefndi, Andrés Björnsson útvarpsstjóri f. h. Ríkisútvarpsins, greiði stefnanda, Dóru Hafsteinsdóttur, kr. 174.680.92 auk 7% ársvaxta af kr. 973.94 frá 1. janúar 1967 til 31. desember 1967, af kr. 9.079.20 frá þeim degi til 31. desember 1968, af kr. 21.161.63 frá þeim degi til 31. desember 1969, af kr. 36.867.11 frá þeim degi til 31. desember 1970, af kr. 63.076.30 frá þeim degi til 31. desember 1971, af kr. 92.197.35 frá þeim degi til 31. desember 1972, af kr. 136.462.22 frá þeim degi til 16. maí 1973 og 9% ársvaxta af sömu fjárhæð til 31. desember 1973, en af kr. 174.680.92 frá þeim degi til greiðsludags og kr. 45.000 í málskostnað, allt innan 15 daga frá lögbirtingu dóms þessa að viðlagðri aðför að lögum.

Þriðjudaginn 15. febrúar 1977.

Nr. 235/1976. **Veiðifélag Borgarfjarðar**

gegn

Jóni Guðmundssyni.

Kærumál. Dómkvaðning matsmanna samkvæmt lögum nr. 76/1970 úr gildi felld.

Dómur Hæstaréttar.

Kærumál þetta dæma hæstaréttardómararnir Magnús Þ. Torfason, Benedikt Sigurjónsson og Logi Einarsson.

Ásgeir Pétursson, sýslumaður í Mýra- og Borgarfjarðarsýslu, hefur framkvæmt hina kærðu dómkvaðningu.

Með kærú 4. nóvember 1976, sem barst Hæstarétti 14. desember 1976, hefur sóknaraðili kært dómkvaðningu mats-

manna „til þess að framkvæma mat á bótum, sem um er kafið eftir 3. tl. 95. gr. laga nr. 76/1970“. Dómkvaðningin fór fram á aukadómþingi Mýra- og Borgarfjarðarsýslu 3. febrúar f. á. Sóknaraðili virðist eigi hafa fengið vitneskju um hana fyrr en 26. október sl. Hann krefst þess, að dómkvaðningin verði ómerkt, en kærumálskostnaður verði látinn falla niður.

Héraðsdómari tilkynnti varnaraðilja um kæru máls þessa með bréfi 14. janúar 1977. Frá honum hafa hvorki borist kröfur né greinargerð.

Sóknaraðili er samband veiðifélaga í Mýra- og Borgarfjarðarsýslu og málsvari þeirra út á við, sbr. 3. gr. og 4. gr. samþykktar nr. 101/1975. Matsmenn kvöddu fulltrúa veiðifélaganna til fundar 26. október 1976 og skýrðu þeim frá dómkvaðningunni. Með vísan til þessa svo og með hliðsjón af niðurlagsákvæði 3. tl. 95. gr. laga nr. 76/1970 varðar dómkvaðningin sóknaraðilja með þeim hætti, að honum er heimil kæra máls þessa.

Í matsbeiðni var eigi skilmerkilega greint, að hverjum matsbeiðendur hygðust beina þeim kröfum um skaðabætur, sem meta átti. Bar héraðsdómara að inna matsbeiðendur nánar eftir því. Að því búnu átti hann, eins og atvikum máls þessa er háttað, að gera matsbeiðendum og matsþola viðvart, áður en dómkvaðning færi fram, svo að þeir gætu lýst viðhorfi sínu til hennar, sbr. 3. mgr. 139. gr. laga nr. 85/1936, sem hér á við eftir undirstöðurökum sínum. Héraðsdómari hefur ekki gætt þess að láta málið sæta slíkri meðferð. Verður því að ómerkja hina kærðu dómkvaðningu.

Kærumálskostnaður verður ekki dæmdur.

D ó m s o r ð :

Hin kærða dómkvaðning er úr gildi felld.

Dómkvaðning matsmanna á aukadómþingi Mýra- og Borgarfjarðarsýslu 3. febrúar 1976.

Ár 1976, þriðjudaginn 3. febrúar, var aukadómþing Mýra- og Borgarfjarðarsýslu sett í skrifstofu réttarins í Borgarnesi og haldið af Ásgeiri Péturssyni sýslumanni með undirrituðum vottum.

Fyrir var tekið: Að dómkveðja matsmenn til þess að framkvæma mat á bótum, sem um er kafið eftir 3. tl. 95. gr. laga nr. 76/1970.

Dómarinn leggur fram nr. 1 beiðni um dómkvaðningu matsmanna í framangreindu skyni, upplestin, svohljóðandi:

„Lögmenn Vesturgötu 17.

Hr. Ásgeir Pétursson sýslumaður

Skrifstofu Mýra- og Borgarfjarðarsýslu, Borgarnesi.

Reykjavík, 27. nóvember 1975.

Efni: Beiðni um dómkvaðningu matsmanna.

Með úrskurði, uppkveðnum í Reykjavík 5. nóvember 1975, synjaði meirihluti yfirmatsnefndar bótakröfu Jóns Guðmundssonar, Bóndhóli, á hendur ríkissjóði og sýslusjóði Mýrasýslu vegna skertrar veiðiaðstöðu í Hvítá fyrir Bóndhólslandi árin 1970—1973, að báðum árunum meðtöldum. Í úrskurði nefndarinnar segir m. a.:

„Á hann því ekki skaðabótakröfu samkvæmt 1. tl. 95. gr. 1. nr. 76/1970 á hendur ríkissjóði og sýslusjóði Mýrasýslu. Hins vegar á hann skaðabótakröfu samkvæmt 3. tl. 95. gr. á hendur veiðieigendum í fiskihverfi sínu“.

Hér með fer ég þess á leit f. h. umbjóðanda míns, Jóns Guðmundssonar, Bóndhóli, að þér dómkveðjið matsmenn hið allra fyrsta til að meta bætur til handa umbjóðanda mínum, sbr. 3. tl. 95. gr. 1. 76/1970.

Virðingarfyllst,

F. h. Jóns Steinars Gunnlaugssonar hdl.

Þórður Gunnarsson lögfr.

ÞG:hg.“.

Nr. 1, framl. í aukadómþingi Mýra- og Borgarfjarðarsýslu 3/2 1976. Ásgeir Pétursson.

Til þess að framkvæma hið umbeðna mat, að meta bætur til handa Jóni Guðmundssyni vegna skertrar veiðiaðstöðu í Hvítá fyrir Bóndhólslandi árin 1970—1973, að báðum meðtöldum, sbr. 3. tl. 95. gr. laga nr. 76/1970 um lax- og silungsveiði, eru dómkvaddir sem þar til hæfir og óvilhallir menn þeir Jón Magnússon sýslufulltrúi, Stykkishólmi, og Hinrik A. Þórðarson, fyrrv. bóndi, Nóatúni 18, Reykjavík.

Hinir dómkvöddu matsmenn skulu framkvæma matið af alúð og samviskusemi og óhlutdrægni í hvívetna og eftir bestu þekkingu og vitund. Þeir skulu tilkynna viðkomandi aðiljum, hvar og

hvenær matið fer fram, og gefa þeim kost á að koma að gögnum og upplýsingum um matsatriði.

Að matinu loknu skulu þeir gera um það skriflega skýrslu, sem þeir mega vera reiðubúnir að staðfesta með eiði sínum fyrir rétti, ef krafist verður.

Matinu skal hraðað.

Þriðjudaginn 15. febrúar 1977.

Nr. 243/1976. **Veiðifélag Borgarfjarðar**

gegn

Benjamín Ólafssyni

Guðmundi Bjarnasyni og

Sveini Bjarnasyni.

Kærumál. Dómkvaðning matsmanna samkvæmt lögum nr. 76/1970 úr gildi felld.

Dómur Hæstaréttar.

Kærumál þetta dæma hæstaréttardómararnir Magnús Þ. Torfason, Benedikt Sigurjónsson og Logi Einarsson.

Ásgeir Pétursson, sýslumaður í Mýra- og Borgarfjarðarsýslu, hefur framkvæmt hina kærðu dómkvaðningu.

Með kærú 5. nóvember 1976, sem barst Hæstarétti 14. desember 1976, hefur sóknaraðili kært dómkvaðningu undir matsmanna til að meta varnaraðiljum bætur vegna skertrar veiðiaðstöðu í Hvítá árin 1970—1973, sbr. XV. kafla laga nr. 76/1970. Dómkvaðningin var framkvæmd að beiðni varnaraðilja og fór fram á aukadómþingi Mýra- og Borgarfjarðarsýslu 3. febrúar 1976. Sóknaraðili virðist eigi hafa fengið vitneskju um dómkvaðninguna fyrr en 26. október 1976. Hann krefst þess, að dómkvaðningin verði ómerkt, en kærumálskostnaður verði látinn falla niður.

Héraðsdómari tilkynnti varnaraðiljum um kærú máls þessa